


lwnh mbanj sawgeq cihsaw minzczunz noix Gvangjsih



▲ Gij ingj bonjcau 《Fwen Sung Cinh》.

Sawgeq Sawnamz Ginghamz: Seiraez Lwnhsaeh《Fwen Sung Cinh》

Mbouj faen gienj, cek ndeu, 53 yieb. Mbouj rox coh bouxsij, Yonj Gizfuz lingh caubonj. Cejsa, cangbwn, Sawnamz cauloeg, sawmaeg. Ceksaw sang 21.5 lizmij, gvangq 17.5 lizmij, moix buenq yieb 16 baiz, baiz miz 14 cih. Cek caubonj neix youq 2009 nienz daj Dunghhingh Si Gyanghbingz Cin Vanveij Cunh soucomz, seizneix yo youq Gvangjsih Bouxcuengh Swcigih Saujsu Minzczunz Gujcz Baujhu Yenzgiu Cunghsinh.

《Fwen Sung Cinh》yienzbong dwg Fangzczwngzgangj Si Gungh-anhgiz duiyouh ganbu Suh Veizfangh souyo, de duiyouh le youq Dunghhingh Si Gyanghbingz Cin Vanveij Cunh youq. Ciuq Suh Veizfangh sienseng gaisau, goengda de Yonj Gizfuz dwg goengdauh mizmingz Ginghamz dieg neix, seiznyez daxgoeng ciengzseiz lwnh goj 《Fwen Sung Cinh》hawj de dingq, de ciengzseiz dingq dwk haeujmaez bae. Goengda raen de maij dingq, daegdaengq lai sonyinx, yungh sam ndwen seizgan, cau 《Fwen Sung Cinh》baenz cek soengq hawj daeglan, lij son de yawj doeg gij Sawnamz ndaw saw. 1965 nienz Suh Veizfangh wngq iuheuh bae dangbing, yaek bae dangbing gaxgonq ciq bonj saw neix hawj Gyanghbingz Cin Sanhsinh Dauj Fan Cungfangh. Doeklaeng Fan Cungfangh gvaqseiq, bonj saw neix daengz ndaw fwngz Vangz Bwzvwngz, Yonj Gicuh. 2001 nienz Suh Veizfangh duiyouh dauq daengz ranzcoj Vanveij Cunh, cij daj Yonj Gicuh gizhaenx dawz bonj saw neix dauq. 2009 nienz, Suh Veizfangh gien bonj saw neix hawj Gvangjsih Bouxcuengh Swcigih Saujsu Minzczunz Gujcz Baujhu Yenzgiu Cunghsinh ciengxlwenx souyo.

《Fwen Sung Cinh》heuh baenz “fwen doeknaiq

Ginghamz”, dwg bouh fwen raez lwnh aen goj ndiepgyaez. Daengx bouh sei yungh gij hingzsik “roek bet daej” fwen Ginghamz gag miz haenx, coenz baihnaj roek cih, coenz baihlaeng bet cih. Bibi bungz Ginghamz conzdungj Ciethahcez youq hahdingz yienjciengq. Seiraez lwnh ciengq Vujdai Cibguk seizgeiz Sung Cinh caeuq Vagut gij goj ndiepgyaez haenx. Sung Cinh ndaw ranz gungzhoj, 3 bi daxboh dai, caeuq daxmeh bae vaq gwn. Miz ngoenz ndeu Sung Cinh dingjlingz bungzraen dah ranzfouq Vagut, Vagut vih gij ginglig siliengz Sung Cinh gamjdoengh, soengq haeux caeuq ngaenz hawj de, caemhcaiq gag caeuq Sung Cinh laeglemx dingh doxaeu. Doeklaeng Sung Cinh bae Gingsingz gaujsi, gauj ndaej canghyienz, vuengzdaeq gig yawjnaek gij caixhangz de, yaek haq dahlwg de hawj Sung Cinh, Sung Cinh mbouj nyienh. Vuengzdaeq hozndat, fad de bae aen guk baihbaek 10 bi. Vagut mbouj lumz mbouj vut de, gag youq ranz fugsahg enggubuz, caj de 10 bi, de baenzneix hauqswnh baenzneix cingznaek vunzlai cungj gamjdoengh, doeklaeng vuengzdaeq dauqdaej cinjhawj Sung Cinh caeuq Vatgut caemhyouq guh gya.

Ginghamz daj Mingzdai hainduj senj daengz Dunghhingh Si Sanhsinh, Vuhdouz, Vanveij sam dauj youq, dieghaij gig mbouj ndei souyo sawceij. 《Fwen Sung Cinh》yienznaeuz dwg bonjsaw lingh cau, nienzdaih hix haemq gyawj daih raeuz, hoeng dieg Ginghamz cek caubonj Sawnamz ndaej souyo roengzdaej mbouj miz geijlai bonj, gij gyaciz de gig dijbauj, doiq yenzgiu aenbiengz, vwnzyoz, lunzlij, cezyoz caeuq lizsij deihfueg Ginghamz daengj miz camgauj gyaciz.

Sawgeq Yizvwngz Yizcuz:

Sawmo Bouxmo《Sijsei Roek Coj》

Mbouj faen gienj, cek ndeu, 18 yieb. Mbouj rox coh bouxsij, caubonj Cingciuz. Cejsa, cangbwn, Yizvwngz cauloeg, sawmaeg. Ceksaw sang 17 lizmij, gvangq 12.5 lizmij, moix buenq yieb 7 baiz, baiz miz 15 cih. Cek caubonj neix youq 20 sigij 80 nienzdaih daj Lungzlinz Gak Cuz Swciyen soucomz, seizneix yo youq Lungzlinz Gak Cuz Swciyen Bozvuzgvanj.

Yizcuz dwg lwglan daihlaeng ciuhgonq vunz Dijgyangh. Yizcuz ndawbiengz cienzgangj, miz bi ndeu dauqcawq dwg raemxrongz, Yizcuz cojcoeng Dujmu gwih max, gyaep yienzgyoengq, vihliux ndoj raemxrongz daej daengz byasang Byalozyiz (cienzgangj youq ndaw dieg Yinznanz Swngj). De aeu sam dah sien guh yah, seng Muyajguh, Guyajcez, Muyajyez, Muyajvo, Mugwzgwz, Mucicziz roek boux lwg, lizsij heuhguh roek coj, doeklaeng gyoengqde sanj baenz Vuj, Ca, No, Hwngz, Bu, Moz roek aen buloz. Vuj bulozcangj Muyajguh, Ca bulozcangj Muyajcez daiq song bang vunz riengz Dahbujduhoz coh baihnanz fazcanj, cigdaengz seizneix Yinznanz baihnanz caeuq baihsae rangh neix. No bulozcangj Muyajyez, Hwngz bulozcangj Muyajvo daiq song bang vunz, coh Dahginsahgyangh cugciemh haeujdaengz seizneix Swconh Liengzsanh, Conhnanz caeuq Yinznanz Cauhdungh diegbya Vuhmungz. Bu bulozcangj Mugwzgwz, Moz bulozcangj Mucicziz daiq song bang vunz coh diegyang fazcanj, cugciemh fazcanj daengz seizneix Yinznanz Gizcing, Senhveih caeuq Gveicouh Hinghyi, Bujan, Anhsun, Veihningz, Bizcez Suijsih rangh neix, ndawde mbanj noix vunz roengz baihnanz haeuj daengz seizneix Gvangjsih, cujyau comzyouq Lungzlinz, Nazboh, Sihlinz, Denzlinz doengh gij dieg neix, dingzlai caeuq Bouxcuengh, Bouxgun cabyouq. Vunzlaeng dawz ciuhgonq vunz Yizcuz baez senjdieg neix heuhguh “roek coj faen nga”.

Bonj saw neix yienzlaiz mbouj miz coh saw, 《Sijsei Roek Coj》dwg bouxbien gaengawq cawjdaej neiyungz daej an. Yozsuzgai nyinhnaeuz, Gvangjsih Yizcuz daj Samguk Sujhan seizgeiz hainduj, laebdaeb daj Yinznanz Cujyungz, Dalij caeuq Gveicouh Hinghyi, Banzyen daengj

dieg senj daej, caeuq gwnzneix ndawbiengz cienzgangj ca mbouj lai doxdoengz. Bonj saw neix baujlouz le “roek coj faenga” cienzgangj ndawde mbanj neiyungz. Lumjbaenz ndaw saw geiqsij caeqbaiq cojcoeng, gya’ gvangq daengz caeqbaiq sam boux daxmeh roek coj, couh dwg caeq dahlwg Guhswzniz, dahlwg Nwngzswznwngz, dahlwg Buswnaz, sam boux daxmeh roek coj dwg youq mwh raemxrongz daengz, ranzvunz deng dumh liux le, dingq dienmingh youq Bizguzgwnjgaz doiqfwen le haq hawj cojcoeng Dujmu. Neix ndaej gangj dwg senjdieg le dauqngex gij lizsij cojcoeng geizcaeux.

Bonj saw neix lij geiqsij baenzlawz caeq nienzsaenz nyiedsaenz, fangjyingj vunz ciuhgonq Yizcuz nyinhrox dienfaenz lwdfap. Ndaw saw naeuz: “Ciuhgonq mbouj miz seizgan gonqlaeng, Cwzgwngshwh(cohsaenz) caeuq Hwngz-dufuj(cohsaenz) naeuz baenzneix mbouj ndaej, yaek hawj seizgan dingh gonqlaeng, Gwngshwh guenj bi, dawz bi ndeu dingh baenz cibngeih ndwen, Dufuj guenj ndwen, dawz ndwen ndeu dingh baenz samcib ngoenz, youz Niznwngz daej guenj ngoenz, dawz ngoenz ndeu dingh baenz cibngeih diemj cung, canghmbwn Gouahlouz coih diuzroen daengngoenz, canghdeih Gwzahdwz coih diuzroen ronghndwen.” “Seizcin sam ndwen, youz saenzhung Dumujdaz gaemguen, seizzah sam ndwen, youz saenziq Namugouh gaemguen, seizdoeng sam ndwen, youz Cizsaenz Nozswznwngzmizfuj guenj, seiq aen geiqciet, youz seiq boux saenzak guenj, yienq seiq bouxak caeqbaiq, yienq nienzsaenz nyiedsaenz caeqbaiq”.

Gvangjsih sawgeq Yizvwngz cienz seiq gig noix, dangqnaej dandan raen Lungzlinz Gak Cuz Swciyen Bozvuzgvanj yo 《Sijsei Roek Coj》bouh ndeu caeuq Gvangjsih Minzczunz Bozvuzgvanj yo linghvaih seiq bouh vwnzyen. Gij daegdiemj yienhda haj bouh sawgeq neix dwg cihsaw baujlouz gij yienghceij Yizvwngz gaeuq geizcaeux, caeuq Yinznanz, Swconh, Gveicouh Yizvwngz ginggvaq lai baez gajgwz gveihfan le cengca haemq hung, gij vwnzyen gyaciz caeuq yozsuz gyaciz de mbouj gangj cungj rox.

(Vangz Gyanghmyauz hoiz)



▲ Gij ingj bonjcau 《Sijsei Roek Coj》.